

BOSNA I HERCEGOVINA

Brčko distrikt BiH

SKUPŠTINA

BRČKO DISTRIKTA BiH



БОСНА И ХЕРЦЕГОВИНА

Брчко дистрикт БиХ

СКУПШТИНА

БРЧКО ДИСТРИКТА БиХ

Mladena Maglova 2, 76100 Brčko distrikt BiH, telefon i faks: 049/215-516

Младена Маглова 2, 76100 Брчко дистрикт БиХ, тел. и факс: 049/215-516

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 3. redovnoj sjednici održanoj 24. februara 2021. godine, usvaja

ZAKON

O IZMJENAMA I DOPUNAMA ZAKONA O IZVRŠNOM POSTUPKU BRČKO DISTRIKTA BOSNE I HERCEGOVINE

Član 1

U Zakonu o izvršnom postupku Brčko distrikta Bosne i Hercegovine (Službeni glasnik Brčko distrikta Bosne i Hercegovine, br. 39/13 i 47/17), u članu 9 stavovi 3 i 4 se mijenjaju i glase:

„(3) Ako se izvršno rješenje o izvršenju na određenom predmetu ili određenim sredstvom ne može provesti, tražilac izvršenja može radi namirenja istog potraživanja predložiti novi predmet ili sredstvo izvršenja, u roku od petnaest (15) dana od prijema obavještenja suda da se izvršenje nije moglo provesti na predloženom predmetu ili predloženim sredstvom izvršenja, o čemu će sud odlučiti rješenjem. U tom slučaju, sud će donijeti novo rješenje o izvršenju, nastaviti sa izvršenjem na osnovu tog rješenja o izvršenju, a obustavit će izvršenje određeno prethodnim rješenjem o izvršenju.

(4) Ukoliko tražilac izvršenja, u roku od petnaest (15) dana, od dana prijema obavještenja suda o nemogućnosti provođenja izvršenja ne podnese prijedlog iz stava 3 ovog člana, izvršenje će se obustaviti.“

Član 2

U članu 18 stav 2 mijenja se i glasi:

„(2) Tražilac izvršenja odnosno predlagač obezbjeđenja, dužan je troškove postupka predujmiti u roku koji sud odredi. Sud će obustaviti izvršenje, odnosno postupak obezbjeđenja ako troškovi ne budu predujmljeni u tom roku. Ako u roku ne

budu predujmljeni troškovi o kojima zavisi preduzimanje samo neke radnje, ta se radnja neće provesti.“

Član 3

U članu 33 stav 2 mijenja se i glasi:

„(2) Vjerodostojna isprava je, prema ovom zakonu, mjenica i ček s protestom i povratnim računom ako su potrebni za zasnivanje potraživanja, i računi ili izvodi iz poslovnih knjiga za cijenu komunalnih usluga isporuke vode, toplotne energije, odvoz smeća i radio-televizijske takse radio-televizijskih servisa za posjedovanje radio ili televizijskog prijemnika, usluga telefonskih operatera, naplate javnog parkinga i naknade za održavanje zajedničkih prostorija.“

Član 4

U članu 44 stavovi 1, 2, 3 i 4 se mijenjaju i glase:

„(1) Zavod za penzijsko i invalidsko osiguranje i Porezna uprava Distrikta dužni su, u roku od osam (8) dana od dana uredno podnesenog zahtjeva, licu koje raspolaže izvršnom ili vjerodostojnom ispravom i namjerava pokrenuti izvršni postupak ili postupak obezbjeđenja, ili za postupak koji je u toku, dati podatke o tome da li je neko fizičko lice osiguranik u tom Zavodu za penzijsko i invalidsko osiguranje, po kojoj osnovi (radni odnos, samostalna profesionalna djelatnost, obrt ili samostalna djelatnost poljoprivrede) i kod koga, odnosno prima li penziju, invalidninu ili koju drugu stalnu naknadu o kojoj vode evidenciju.

(2) Policija Brčko distrikta Bosne i Hercegovine i nadležno odjeljenje Vlade Brčko distrikta Bosne i Hercegovine dužni su u roku od osam (8) dana od dana uredno podnesenog zahtjeva, licu koje raspolaže izvršnom ili vjerodostojnom ispravom i namjerava pokrenuti izvršni postupak ili postupak obezbjeđenja, ili za postupak koji je u toku, iz evidencije o motornim vozilima dati podatke o tome je li neko lice upisano kao vlasnik motornog vozila, te o vrsti, marki, tipu, modelu, godini proizvodnje, registarskom broju motornog vozila i postojanju tereta na tom vozilu.

(3) Banka, druga finansijska institucija ili druga organizacija ovlaštena za vođenje glavnih računa poslovnih subjekata ili druga agencija dužna je, u roku od osam (8) dana od dana uredno podnesenog zahtjeva, licu koje raspolaže izvršnom ili vjerodostojnom ispravom i namjerava pokrenuti izvršni postupak ili postupak obezbjeđenja, ili za postupak koji je u toku, dati podatke: o računu fizičkog lica, o računu za redovno poslovanje nekog poslovnog subjekta, a ako ih ima više - o računu za redovno poslovanje kojeg je taj subjekt odredio kao račun na kojem će se izvršavati nalozi za plaćanje zakonskih obaveza i javnih prihoda, nalozi za naplatu vrijednosnih papira i instrumenata obezbjeđenja plaćanja, te nalozi s naslova izvršenja sudskih odluka i drugih izvršnih isprava (glavni račun).

(4) Zemljišnoknjižni ured te Ured za katastar nekretnina je dužan, u roku od osam (8) dana od dana uredno podnesenog zahtjeva, licu koje raspolaže izvršnom ili vjerodostojnom ispravom i namjerava pokrenuti izvršni postupak, ili za postupak koji

je u toku, izdati zemljišnoknjižni izvadak, odnosno kopiju posjedovnih listova, koje vodi za fizičko ili pravno lice.“

Član 5

U članu 47 stav 2 mijenja se i glasi:

„Ukoliko je rješenjem o izvršenju određena i naplata kamata, obračun kamate o trošku tražioca izvršenja obaviti će izvršni sud, osim kada se naplata vrši na sredstvima na računima kod banaka ili drugih pravnih subjekata koji vrše zaplenu sredstava po nalogu suda. U tom slučaju obračun kamate bit će izvršen na teret izvršenika.“

Član 6

Član 76 se mijenja i glasi:

„Član 76
(Vrijeme za koje se izvršenje odlaže)

(1) Sud će odložiti izvršenje za vrijeme koje je tražilac izvršenja odredio, ili na vrijeme koje, prema okolnostima slučaja, smatra opravdanim, ali ne na duže od šest (6) mjeseci.

(2) Izuzetno, sud može na prijedlog tražioca izvršenja odložiti izvršenje i na duži vremenski period ukoliko su tražilac izvršenja i izvršenik zaključili pismeni sporazum, ali ne duže od godinu dana.

(3) Ako je tražilac izvršenja podnio prijedlog za odlaganje izvršenja u slučaju u kome je zakonom predviđeno da se izvršenje ima tražiti u određenom roku, izvršenje se ne može odložiti za vrijeme duže od tog roka.“

Član 7

Član 77 mijenja se i glasi:

„Član 77
(Nastavljanje odloženog postupka)

(1) Odloženo izvršenje nastavlja se na prijedlog tražioca izvršenja prije isteka ili po isteku roka na koje je odloženo.

(2) Ako tražilac ne predloži nastavak izvršnog postupka ni po isteku roka od trideset (30) dana od dana isteka vremena na koje je izvršenje odloženo, sud će obustaviti izvršenje.“

Član 8

U članu 78 stav 3 mijenja se i glasi:

„(3) Sud će donijeti rješenje kojim obustavlja postupak izvršenja, ukoliko tražilac izvršenja u roku od petnaest (15) dana od prijema obavještenja o nemogućnosti provođenja izvršenja na predloženom predmetu i predloženim sredstvom izvršenja, ne predloži novi predmet ili sredstvo izvršenja, u skladu s članom 9 stavom 3 ovog zakona.“

Član 9

Član 86 se mijenja i glasi:

„Član 86 (Nepokretnost kao predmet izvršenja)

(1) Ukoliko nije drugačije određeno, predmet izvršenja može biti samo nepokretnost kao cjelina određena propisima koji uređuju svojinu i druga stvarna prava.

(2) Suvlasnički dio nepokretnosti može biti samostalan predmet izvršenja u pogledu kojeg se na odgovarajući način primjenjuju pravila ovog zakona o izvršenju na nepokretnostima.

(3) U slučaju postupka izvršenja na suvlasničkom dijelu, a prema zahtjevu tražioca izvršenja, izvršenika ili drugog suvlasnika, sud će u rješenju o izvršenju odrediti da se na prodaju ponudi kako cjelokupna nepokretnost tako i suvlasnički dio, koji je predmet izvršenja, samo ako na to izričito pristane suvlasnik nepokretnosti koji nije izvršenik. Prije donošenja rješenja o izvršenju, sud mora da pribavi izričit pristanak suvlasnika nepokretnosti koji nije izvršenik i u rješenju o izvršenju odlučiti da li je predmet prodaje cjelokupna nepokretnost ili samo njen suvlasnički dio. U istom rješenju sud će odrediti da se zabilježba izvršenja iz člana 91 ovog zakona odnosi na cjelokupnu nepokretnost ili na njen suvlasnički dio. Izjava suvlasnika, koji nije izvršenik, mora biti notarski obrađena, a ukoliko suvlasnik, koji nije izvršenik, ne dostavi notarski obrađenu ispravu u roku od petnaest (15) dana, smatra se da nije dao pristanak za prodaju njegovog suvlasničkog dijela.

(4) U slučaju da nema izričitog pristanka suvlasnika nepokretnosti iz stava 3 ovog člana, koji nije izvršenik, sud će nastaviti postupak izvršenja na suvlasničkom dijelu izvršenika.

(5) U slučaju da suvlasnik nepokretnosti koji nije izvršenik nije dao izričit pristanak za prodaju cjelokupne nepokretnosti, a prodajna cijena suvlasničkog dijela nepokretnosti bi mogla biti znatno viša u slučaju prodaje cjelokupne nepokretnosti, sud će odrediti prodaju cjelokupne nepokretnosti postupajući kao da se radi o zahtjevu suvlasnika za diobu fizički nedjeljive stvari, kako je to predviđeno propisima koji uređuju suvlasničke odnose.

(6) U slučaju iz stava 5 ovog člana, suvlasnici koji nisu izvršenici imaju pravo na namirenje u visini suvlasničkih dijelova iz iznosa dobijenog prodajom stvari prije namirenja tražioca izvršenja i drugih lica koja se namiruju u izvršnom postupku, te prije naknade troškova izvršnog postupka.

(7) Suvlasnici koji nisu izvršenici imaju pravo zahtijevati da im se stvar koja je predmet izvršenja ustupi ako polože iznos koji odgovara vrijednosti izvršenikovog udjela u toj stvari.

(8) Suvlasnika koji nije izvršenik, a kojem je osporen udio u stvari koja je predmet izvršenja, sud će uputiti na parnicu protiv tražioca izvršenja, a i protiv izvršenika ako i on osporava njegovo pravo, da dokaže svoje pravo, osim ako u izvršnom postupku može dokazati svoje pravo pravosnažnom presudom, javnom ispravom ili po zakonu ovjerenom privatnom ispravom. Na pokrenutu parnicu kao i na prava suvlasnika da u njoj traže odlaganje postupka izvršenja shodno se primjenjuju odredbe ovog zakona kojim se uređuje postupanje suda po prigovoru trećih lica.

(9) Ako suvlasnik iz stava 8 ovog člana može dokazati svoje pravo pravosnažnom presudom, javnom ispravom ili po zakonu ovjerenom privatnom ispravom, sud će postupati kao da njegovo pravo nije osporeno.

(10) Okolnost da je sud u izvršnom postupku uzeo da pravo lica iz stava 8 ovog člana nije osporeno u smislu odredaba tog stava ili stava 9 ovog člana, ne utiče na pravo tražioca izvršenja ili izvršenika da svoja prava protiv tog lica ostvaruju u posebnoj parnici.

(11) Odredbe stavova od 2 do 10 ovog člana, na odgovarajući način se primjenjuju i na vlasnike zajedničke imovine. Ako između izvršenika i ostalih vlasnika zajedničke imovine ne postoji saglasnost o njihovim pravima u zajedničkoj stvari, sud će vlasnika zajedničke imovine koji osporava izvršenikova prava na zajedničku stvar zaključkom uputiti da svoja prava dokazuje u parnici. Na pokrenutu parnicu kao i na prava vlasnika zajedničke imovine da u njoj traže odlaganje postupka izvršenja shodno se primjenjuju odredbe ovog zakona kojim se uređuje postupanje suda po prigovoru trećih lica.

(12) Ako je u vezi neke nepokretnosti ili njenog idealnog dijela osnovano pravo plodouživanja, ono može biti samostalni predmet izvršenja s tim da izvršenik može namiriti svoje potraživanje iz plodova koje to pravo daje na osnovu nekog pravnog odnosa (najamnina, zakupnina), u pogledu čega se na odgovarajući način primjenjuju pravila ovog zakona o izvršenju na pravima.“

Član 10

U članu 87 stav 1 mijenja se i glasi:

„(1) Uz prijedlog za izvršenje tražilac izvršenja je dužan podnijeti izvod iz zemljišne knjige, u originalu ili ovjerenoj kopiji, i ne stariji od šest mjeseci, kao dokaz o tome da je nepokretnost upisana kao vlasništvo izvršenika.“

Član 11

U članu 114 stav 4 mijenja se i glasi:

„(4) Rješenje iz stava 1 ovog člana objavljuje se na oglasnoj tabli suda, te dostavlja kupcu i svim licima kojima se dostavlja zaključak o prodaji.“

Član 12

U članu 118 stav 3 se briše.

Član 13

U članu 130 stav 9 mijenja se i glasi:

„(9) Ako je tražilac izvršenja kupio nekretninu izvršenika, smatra se da je njegovo potraživanje namireno u visini procijenjene vrijednosti nekretnine.“

Član 14

Član 143 se mijenja i glasi:

„Član 143
(Bezuspješna pljenidba)

(1) Ako se pri pljenidbi ne nađu pokretne stvari koje mogu biti predmet izvršenja, sud će o tome obavijestiti tražioca izvršenja koji nije bio prisutan pljenidbi te pozvati istog da predloži novi predmet ili novo sredstvo izvršenja, u smislu člana 9 stava 3 ovog zakona.

(2) Tražilac izvršenja koji je bio prisutan pljenidbi može u roku od petnaest (15) dana od dana pokušane pljenidbe da predloži novi predmet ili novo sredstvo izvršenja, u smislu člana 9 stava 3 ovog zakona.

(3) Ukoliko tražilac izvršenja ne postupi u ostavljenom roku iz stavova 1 i 2 ovog člana sud će obustaviti postupak izvršenja.“

Član 15

U članu 235 stav 5 se mijenja i glasi:

„(5) O vremenu i mjestu preduzimanja izvršnih radnji radi oduzimanja djeteta sud će po pravilima o ličnom dostavljanju obavijestiti tražioca izvršenja, osobu kojoj će se dijete predati i organ starateljstva.“

Član 16

Iza člana 236 dodaje se novi član 236a koji glasi:

„Član 236a
(Mjere zbog nezakonitog zadržavanja djeteta ili maloljetnika)

Sud će u toku postupka, ukoliko se izvršenje ne može provesti u roku od trideset (30) dana, zbog onemogućavanja provođenja izvršenja od strane lica koje drži dijete ili maloljetnika, obavijestiti nadležno tužilaštvo zbog nezakonitog zadržavanja djeteta ili maloljetnika.“

Član 17

Iza člana 237 dodaje se novi član 237a koji glasi:

„Član 237a
(Provođenje izvršenja radi ostvarivanja kontakata roditelja i djeteta)

(1) Odredbe koje se odnose na predaju djeteta će se primijeniti i kod provođenja odluke za ostvarivanje kontakata djeteta i roditelja i drugih lica s kojim dijete ne živi, određenih izvršnom ispravom.

(2) Izvršenje će se smatrati sprovedenim uspostavljanjem kontakata roditelja i djeteta.

(3) Novi zahtjev se može podnijeti nakon isteka roka od šezdeset (60) dana od uspostavljanja kontakata iz stava 2 ovog člana, za ponovno provođenje odluke o uspostavljanju kontakata roditelja i djeteta.“

Član 18

Član 273 se mijenja i glasi:

„Član 273
(Pravni lijekovi)

(1) Protiv rješenja o prijedlogu za određivanje privremene mjere dopuštena je žalba, u roku od tri (3) dana od dana dostavljanja rješenja.

(2) O žalbi odlučuje Apelacioni sud u roku od osam (8) dana od dana kad je primi.

(3) Žalba se ne dostavlja na odgovor.

(4) Žalba ne odlaže izvršenje rješenja kojim je određena privremena mjera.“

Član 19

(Stupanje na snagu i primjena)

Ovaj zakon stupa na snagu u roku od osam (8) dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-1020/21

Brčko, 24. 2. 2021. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić